

疫喉淺論

邦上夏春農手定


疫喉淺論

存吾春齋藏板

# 正 面 穴 圖



# 背 面 穴 圖



壬子孟夏耕心  
山房朱氏重鋟

自序

夫醫爲仁術重於救人名利兩途弗暇計也嘗讀仲聖傷寒論曰怪當今居世之士曾不留神醫藥精究方術上以療君親之疾下以救貧賤之厄中以保身長全以養其生但競逐榮勢企踵權豪孜孜汲汲惟名利是務嗟乎爭名圖利今古皆然醫理元微病多變化而變化之證莫速於咽喉白腐尤莫速於會厭腐潰余學淺齒衰每臨斯證競競業業以期有濟於人總之醫難十全祇求無愧於心前著疫喉淺論明知未能合拍今復補著會厭論不憚煩瑣

究爲急於救人起見非敢沽名而射利也想同志者當共  
諒之

光緒庚子仲夏邗上拙庵稀叟夏春農書於存吾春齋

疫喉淺論續序

咽通六腑喉通五臟其病有內傷外感之別而內傷外感  
又有寒熱之殊治之亦各有異風寒結於咽喉者溫而散  
之風熱結於咽喉者涼而散之內火不足者燥之以辛熱  
卽所以開其鬱內水不足者潤之以辛涼卽所以通其關  
總使其氣暢痰消則咽喉之患自除此論咽喉之常病也  
若夫疫喉之證吳又可瘟疫論言之甚詳則與常病不同  
何也咽喉之常病感天之清邪而成咽喉之爲疫感地之  
濁邪而得風寒暑溼燥火之氣天之清邪也污穢蟲蛇毒

烈之氣地之濁邪也清邪之傷人也微濁邪之傷人也甚  
幾微之辨大相懸殊卽內經所謂奇恆之病其邪能遍傳  
臟腑經絡不獨咽喉而咽喉之病較他症更險此夏君春  
農疫喉淺論所由作也其書論症則以口鼻受不正之氣  
與二火爲患論方則以清營透邪化毒爲主按法用藥活  
人甚多其羽翼前賢嘉惠後學之功良非淺鮮矣書久刊  
布醫林奉爲渠臬近復詳加增益附以門弟子詮註益臻  
美備故因其書之成而樂爲之序己亥八月愚弟張丙炎

拜譔

新補會厭論序

諺曰醫家有刲股之心此言也姑妄言之姑聽之耳今於夏君春農而信之矣聞其兩次刲股以療二親疾各享遐齡誠孝子也君以孝子之心而兼施仁術每遇貧苦求診者分毫不取極貧則贈以藥餌此明驗也暇則以時下奇幻危險諸症往來於心思所以治之更求救急諸方以解之夫急莫急於咽喉尤莫急於疫喉積之久而發之暴有一潰而不可救藥者君則尋源竟委反復辨論必奪隘斬關絕不掉以輕心隨證立方刊刻行世可謂精且勤矣今

春又補著會厭論爰立證治簡切詳明總求有濟迥非大  
言炎炎無實效者雖非聖手然以天士之小心施回春之  
妙手可不謂賢乎余不知醫而君以慎醫自勗大作見示  
云素靈精義亟微哉氣運陰陽莫混猜勤我工夫求實效  
感人疾苦動深哀七方纔覺分奇偶三指常憂昧去來反  
掌毫釐生死判知機應變愧無才諷誦再三真老至深於  
醫理細也若諺所云有刲股之心庶幾近之從此字內同  
登壽域豈不快哉

論曰國家莫大於兵刑亦莫重於兵刑兵則教民七年乃

可卽戎不教而殺謂之虐一敗則萬骨成灰矣刑則先王  
有明慎用刑之語蓋死者不可復生醫家亦然生死關頭  
祇爭頃刻病家不知醫無怪也醫若技藝不精模稜兩可  
誤事非淺或不問病者平時氣血虛實表裏寒熱又不明  
經絡府俞陰陽會通惟有各承家技終始順舊省疾問病  
務在口給相對斯須便處湯藥似此按寸不及尺握手不  
及足而欲倉猝奏功是猶盲人行路而必致多岐也可乎  
哉時在

光緒庚子夏五月耄學詞人姻愚弟徐穆嘯竹氏拜序於

竹西草堂

疫喉淺論序

近代言溫疫者以鞠通吳氏爲最詳而實本諸葉氏吳氏  
溫病條辨言疫言痧不言喉葉氏臨證指南言疫言喉言  
痧而未統言疫喉痧 先生此書明其自來窮其究竟謂  
疫者役也如役使然又役者行也用也皆動象也以三焦  
相火爲發源以肺胃二經爲戰場以口鼻吸受疫厲不正  
之氣爲賊渠其論至明且切予因得推其意而廣之夫用  
藥如用兵治病如治敵古人稱要隘之地必曰咽喉然則  
咽喉者誠人身之要隘也今疫厲不正之氣而發於咽喉

是要隘已爲賊渠所踞疫喉而見痧則不獨賊踞要隘抑且賊勢蔓延要隘旣踞勢復蔓延當此岌岌乎殆之時自非用兵如孫吳必不能奏膚功於反掌 先生以清火化

毒爲第一要着直洞見賊之伎倆雖經踞要隘而蔓延究竟不過一不正之氣譬如勝算旣握自不難迎刃而解故集中所用諸方皆堂堂正正之師以至正治不正王師所至烏合立散真是擒賊擒渠手段病解之後主以清熱救陰之品又如瘡瘍甫定必掃其餘燄復其元氣而後大功乃可告成苟明乎此以之治天下不難也醫云乎哉疫喉

妙云乎哉

時

同治拾叁年歲在甲戌仲冬之月冬至後三日

鄉愚弟雨芹陳浩恩謹序

疫喉淺論序

疫喉痧一證古無專書其散見於瘍科心得繆氏筆記及李純修之爛喉痧論唐迎川之爛喉丹痧論祖鴻範之爛喉丹痧治宜論等書非不各有心得惜皆語焉不詳大率宜散宜清多執已見遠寒遠熱各有所偏甚矣立說之難也况疫喉痧證來勢極險變證極速且最易傳染若不辨晰精透胸中了然倉猝用藥鮮有不草菅人命者吾揚向多是證今春尤甚夏君春農郡中名醫也每診是疾輒應手而效暇時出所著疫喉淺論一書發明歲運及司天在